

आकाशवाणी

खबरां

1. प्रधानमंत्री नरेंद्र मोदी होरें आखेआ जे छठ महापर्व संस्कृति, प्रकृति ते समाज बश्कार गहरी एकता दा प्रतीक ऐ, मन की बात कार्यक्रम च राष्ट्र गी संबोधित करदे होई मोदी होरें छठ दा वर्त रखने आहली महिलाएं दे समर्पण भाव गी प्रेरणादायक दस्सेआ।
2. श्री मोदी होरें आखेआ जे आप्रेशन सिंदूर नै हर भारती गी गौरव दा एहसास करवाया ते जीएसटी बचत उत्सव गी लेइयै लोके च खासा उत्साह ऐ।
3. प्रधानमंत्री होर वर्चुअल ढंगे कन्नै 22में आसियान-भारत शिखर सम्मेलन च अज्ज हिस्सा लै'रदे ना।
4. उपराष्ट्रपति सी.पी राधाकृष्णन होरें नमें चुनोए दे राष्ट्रपति डॉ. Dr. Patrick Herminie हुंदे शपथ समारोह च शामिल होने आसतै सेशेल्स रवाना होए।
5. चक्रवात मोन्था दे मद्देनजर आंध्र प्रदेश ते पुदुचेरी नै एहतियाती कदम चुक्के।



**PM-MKB**

प्रधानमंत्री नरेन्द्र मोदी होरें छठ महापर्व संस्कृति, प्रकृति ते समाज बश्कार गहरी एकता दा प्रतीक ऐ। आकाशवाणी पर मन की बात कार्यक्रम च अज्ज प्रधानमंत्री होरें आखेआ जे समाज दा हर वर्ग छठ घाटें पर किट्टे आईए भारत दी सामाजिक एकता दी सबनें थवा शैल मिसाल पेश करदा ऐ। उनें छठी दियां सबनें गी मुबारकबाद दिती खारकरी बिहार, झारखंड ते पूर्वांचल दे लोके गी छठ महापर्व दियां शुभकामना दितियां। उनें आखेआ जे छठ दा वर्त रखने आहलियां महिलां जिस समर्पण भाव कन्नै एहदे लेई तैयारियां करदियां न, ओहू अपने आपै च इक प्रेरणा दा स्रोत ऐ ते कन्नै संस्कृति, प्रकृति ते समाज च गैहरी एकता दी मसाल ऐ। प्रधानमंत्री होरें आखेआई जे उनें हाल च गै सारे नागरिकें गी इक चिट्ठी लिखी ही। इसदे च उनें इस वरे दे त्यौहारें गी होर मता जीवंत बनाने आहले देश दी उपलब्धियें दा जिक्र कीता हा। प्रधानमंत्री होरें दस्सेआ जे इसदे परते च केई नागरिकें उनेंगी सनेहे भेजे। मोदी होरें आप्रेशन सिंदूर दा जिक्र करदे होई आखेआ जे इन्नै इर भारती दे गौ ते सम्मान गी केई गुणा बधाई दित्ता ऐ। उनें आखेआ जे इस देआली गी देसै दे उनें इलाके च बी खुशी दे दीए बले च, जित्थे कदें माओवादी आतंक दा न्हेरा छाए दा रौहंदा हा। जीएसटी बचत उत्सव दा जिक्र करदे होई मोदी होरें आखेआ जे एहदी वजह कन्नै धेयारें हर भारतवासी अंदर राहत, खुशी ते उत्साह दिक्खने गी लब्बा जेहडे कीमतें च कमी दे चलदे मती खरीदारी करदे नजरी आए। प्रधानमंत्री होरें स्वच्छता दे जतनें कन्ने सरबंधित देश दे बक्ख बक्ख शैहरें दी किश प्रेरक कहानियें दा जिक्र कीता। उने छत्तीसगढ़ दे अंबिकापुर च प्लास्टिक कचरे दी सफाई आसतै शुरू कीती गेदी अनोखी पैहल दा हवाला दिता। श्री मोदी होरें आखेआ जे अंबिकापुर च कचरा कैफे चलाए जा'रदे ना। मैंग्रोव के महत्व दे बारे च प्रधानमंत्री होरें आखेआ जे मैंग्रोव समुद्र दे खारे पानी ते दलदली जमीन पर अगदे न ते समुद्री व्यवस्था दा इक महत्वपूर्ण हिस्सा ना। प्रधानमंत्री होरें लोके थवा बूटे लाने ते 'एक पेड़ माँ के नाम' अभियान गी होर मता प्रोत्साहन देने दा आग्रह कीता। मोदी होरें सरदार पटेल हुंदी 150मीं जयंती दा बी जिक्र कीता ते आखेआ जे ओहू आधुनिक समें दे महान दिग्गज नेताएं चा इक हे जिनें गांधी जी कोला प्रेरित होइयै अपने आपै गी पूरी चाल्ली स्वतंत्रता आंदोलन दे नमित करी दित्ता हा। प्रधानमंत्री होरें भारत दे राष्ट्रीय गीत - वंदे मातरम दी बी चर्चा कीती। उने आखेआ जे एह देशभक्ति शब्दें सोयां परे इक भावना ऐ। प्रधानमंत्री होरें आखेआ जे वंदे मातरम गीत उस अमूर्त भावना गी मूर्त रूप दिन्दा ऐ। उनें उंदी जयंती दे मौके पर 31 अक्तूबर गी होने आहली रन फॉर युनिटी च शामिल होने लेई लोके दा आह्वान कीता। प्रधानमंत्री नरेंद्र मोदी होरें भारत दे राष्ट्रीय गीत वंदे मातरम बारै दस्सेआ जे औंदी 17 नवंबर गी एह गीत अपने 150में ब'रे च दाखल होई जाहगा। उनें दस्सेआ जे डेढ

सौ बरे पैहले इस गीत गी कंपोज कीता गेआ हा ते 1896 च गुरुदेव रविंद्र नाथ टैगोर होरें इसी पैहली बारी गाया हा। उनें भगवान बिरसा मुंडा होरें गी बी श्रद्धंजलि भेंट जिनें जनजाती लोकें दी भलाई बेहतरी ते देश दी अजादी लेई अपना सब किश कुर्बान करी दित्ता। भगवान बिरसा मुंडा हुं दी जनम जयंती 15 नवंबर गी जनजातीय गौरव दिवस दे रूपै च मनाया जंदा ऐ।

<><><><><><>

### Chhath

अज्ज छप पूजा दा दुआ दिन ऐ जिसी खारना आखदे ना। इस दिन श्रद्धालु बड्डलै थमां सूर्य अस्त होने तोड़ी रूट्टी पानी दा त्याग करिए वरत रखदे ना। इस वरत दा उद्यापन सूर्यास्त बेल्ले सूर्यदेवता होरें गी प्रसाद चाडिए कीता जंदा ऐ। 4 दिन चलने आहली छठ पूजा कल नहाय-खाए कन्नै शुरू होई। भगवान सूर्य ते उंदी बहन छठी मैया हुं दी पूजा-अर्चना दे निमित्त एहू त्यौहार परिवार दी पवित्रता, अंदरूस्ती आस्तै प्रार्थना पर आधारित ऐ।

<><><><><><>

### ASEAN

प्रधानमंत्री नरेंद्र मोदी होर अज्ज बर्चुअल ढंगै नै 22में आसियान-भारत शिखर सम्मेलन च शामिल होडन। इक बयान च विदेशी मामलें सरबंधी मंत्रालय नै आखेआ ऐ जे मोदी होर ते आसियान नेता इकट्टे रलिए आसियान-भारत रिश्ते दी समीक्षा करडन ते रणनीतिक सांझेदारी गी मजबूत करने आस्तै चर्चा बी कीती जाग। एहू आखेआ गेआ ऐ जे आसियान कन्नै रिश्ते गूढे करना भारत दी एकट ईस्टी पालिसी ते हिंद प्रशांत रणनीति दे मजबूत थम्म न। वैश्विक नेता दक्खन पूर्वी एशियाई देशें दे संगठन दे सलाना शिखर सम्मेलन च हिस्सा लैरदे न जेड़ा गै अज्ज कुआलांपुर च होआरदा ऐ। 2 रोजा इस सम्मेलन च मती तवज्जो बपार, सुरक्षा ते क्षेत्रीय स्थिरता पर रौहगा। एशिया दा सभनें शा नमा राष्ट्र तिमोर अज्ज आसियान दा 11मां सदस्य बनी गेआ ऐ। विदेश मामलें दे मंत्री डॉ. एस जयशंकर होर प्रधानमंत्री नरेंद्र मोदी हुं दी बक्खिया 20में पूर्व एशिया शिखर सम्मेलन च कुआलालंपुर च कल हिस्सा लैडन।

<><><><><><>

### VP-Seychelles

उपराश्ट्रपति सी.पी राधाकृष्णन होर अपने सेशल्स दे 2 रोजा दौरे पर निकली गए ना। उपराश्ट्रपति होरें सेशल्स दे नमें राश्ट्रपति डॉ. पैट्रिक हरमिने हुं दे शपथ समारोह च हिस्सा लैडन। राधाकृष्णन होर डॉ. हरमिने होरें गी भारत बक्खिया शुभकामनां देडन ते नेडमें, लम्में चिरें तोड़ी चलने आहले दपक्खी रिश्ते गी मजबूत करने दी प्रतिबद्धता दोहराडन। इक यान च विदेशी मामलें सरबंधी मंत्रालय नै आखेआ ऐ जे भारत दे धेइए महासागर हेठ सेशल्स इक महत्वपूर्ण सांझेदार ऐ।

<><><><><><>

### Bihar-Polls

बिहार विधानसभा चुनाएं च विपक्ष ते सत्ता आहली पार्टी तरफा मतदाताएं गी रिझाने आस्तै वादें पर वादे कीते जा'रदे ना। महागठबंधन दे मुखमंत्री पद दे दावेदार तेजस्वी प्रसाद यादव होरें अज्ज पटना च आखेआ जे अगर उंदी सरकार वजूद च आई ते पंचायती राज प्रतिनिधिएं गी 50 लक्ख रपे दा इंश्योरेंस कवरेज दित्ता जाग। उनें एहू बी घोशणा कीती जे मुखिया, सरपंच ते दुए पंचायती प्रतिनिधिएं दी तनखा दोगुणी करी दित्ती जाग। तोआई, बीजेपी दे वरिष्ठ नेता ते केंद्री गृहमंत्री अमित शाह होरें आखेआ जे छडी एनडीए दी ताकतवर सरकार गै बिहार दी विकास दी बत्ते पर अगुवाई करी सकदी ऐ। उनें आखेआ जे प्रधानमंत्री नरेंद्र मोदी ते मुखमंत्री नितीश कुमार होरें नमें बिहार दे निर्माण दा धेइया कीता ऐ।

<><><><><><>

## Exit-Polls

चुनांऽ आयोग नै आगामी बिहार चुनाव ते उप-चुनाएं दरान प्रचार बंद होने दी 48 घंटे दी अवधि च चुनावी मामलें दे प्रदर्शन ते एग्जिट पोल पर रोक लाने आस्तै इक परामर्श जारी कीता ऐ। आयोग नै आखेआ ऐ जे टीवी, रेडियो चैनल ते केबल नेटवर्क गी एह सुनिश्चित करना लोडचदा जे 48 घंटे दी मौन अवधि दौरान उन्दे आसेआ प्रसारित कार्यक्रमें दी सामग्री च नेआ किश नेई होऐ जेदे नै कुसा विशेष पार्टी या मेदवार दी संभावना गी बढ़ावा देने या चुनां दे परिणाम गी प्रभावित करने दे रूप च मन्नेआ जाई सकदा ऐ। एहदे च कुसा बी जनमत सर्वेक्षण दा प्रदर्शन शामिल ऐ। आयोग नै आखेआ जे एग्जिट पोल दा संचालन ते प्रिंट या इलेक्ट्रॉनिक मीडिया राएं उन्दे परिणामें दा प्रसार 6 नवंबर गी बडुलै 7 बजे थमां 11 नवंबर गी संझा साढे 6 बजे बश्कार प्रतिबंधित ऐ।

<><><><><><>

## GST

नमें जीएसटी सुधारें कन्नै उत्तर प्रदेश करसाने, कारीगरें, लौहके बपारिएं ते मकामी उद्योग गी खासा फायदा होआ'रदा ऐ। खडोने ते हत्थें कन्नै बने दे सजावटी समान पर जीएसटी 12 फीसदी थमां घटिए 5 फीसदी होई जाने करी इस उद्योग कन्नै जुडे दे लोकें गी खरा लाह पुज्जा'रदा ऐ ते एह चीजां किफायती होने करी मतियां बिका दियां ना। इयां गै कानपुर ते आगरा दे चमड़ा उद्योग च विकास दर्ज कीता जा'रदा ऐ। नमीं जीएसटी दरें मताबक ढाई ज्हार मुल्ल दी चमड़े दी चीजें पर सिर्फ 5 फीसद जीएसटी रेही गेआ ऐ। पित्तल दी चीजें पर जीएसटी घटिए 5 फीसद होई गेआ ऐ जिस करी कारीगरें दे रोजगार च स्थिरता औग।

<><><><><><>

## IMD

भारती मौसम विभाग नै आखेआ ऐ जे दक्खन पूर्वी बंगाल दी खाड़ी च दबाऽ करी कल तोड़ी समुंद्री तूफान दे असार बने दे ना। एह तूफान उत्तर पच्छमी दिशा च अगगे बदोग ते मंगलवार तोड़ी बड्डा रूप लेई लैग। तोआई, आंध्र प्रदेश ते पुदुचेरी नै मोंथा तूफान गी दिखदे होई एहतियाती कदम पुट्टे ना। आंध्र प्रदेश हाई अलर्ट पर ऐ, कीजे बंगाल की खाड़ी दे दक्खन पूर्वी हिस्से च मोंथा तेज अंधी झक्खड दे कन्नै भारी बरखा दा कारण बी बनी सकदा ऐ। एह बरखा सोमवार थमां बुधवार तोड़ी होई सकदी ऐ। राज्य सरकार नै जानमाल दे नुकसान गी रोकने आस्तै जरूरी तैयारियां कीती दियां ना। गृह राज्य ते आपदा प्रबंधन मंत्री वंगलपुडी अनिया होरें अधिकारिएं कन्नै अज्ज ताडेपल्ली च तैयारिएं दा जायजा लैता। किश जिलें च अगले त्रै दिनें तोड़ी स्कूलें च छुट्टी रक्खी गेदी ऐ। पुदुचेरी दी यनम थाहर च मेद ऐ जे तूफान करी काकीनाडा दे कोल नकसान होग। 90 थमां 100 किलोमीटर प्रति घंटे दी रफ्तार कन्नै अंधी भारी बरखा दा कारण बी बनोग।

<><><><><><>

## LG-Concert

उपराज्यपाल मनोज सिन्हा होरें आखेआ ऐ जे श्रीनगर च बॉलीवुड गायक सोनू निगम हुं'दे लाइव संगीत कार्यक्रम कन्नै जम्मू-कश्मीर दे सैलसफा क्षेत्र गी बडा मता बढ़ावा थ्होग ते मकामी कलाकारें गी अपने हुनर गी बड्डे पैमाने पर दर्शकें तगर पुजाने लेई इक महत्वपूर्ण मंच उपलब्ध होग। एल.जी हुंदा एह बयान श्रीनगर च संगीत कार्यक्रम लेई कीती जा'रदी तैयारियें दे मद्देनजर आया ऐ। मेद कीती जा'रदी ऐ जे इस कंसर्ट च बडी मती गिनतरी च लोक औडन। एल.जी होरें मेद बुज्झी ऐ जे एहदे कन्नै कश्मीर गी सांस्कृतिक दे कन्नोकन्नी सैलानी केंद्र दे तौरा पर मुख्य भरै च उजागर कीता जाग। उनें श्रीनगर च एह लाइव कंसर्ट आयोजित कराने लेई इक निजी मीडिया चैनल दी सराहना बी कीती। उनें आखेआ जे एह मकामी कलाकारें ते प्रदेश दे समृद्ध सैलसफा क्षेत्र लेई इक महत्वपूर्ण मौका ऐ।

<><><><><><>

## Accession Day

अज्ज 26 अक्तूबर दे ध्याडे गी जम्मू-कश्मीर दे विलय दिवस दे रूप च मनाया जा'रदा ऐ। अज्जै दे ध्याडे सन् 1947 च जम्मू-कश्मीर दे महाराजा हरी सिंह होरें विलय पत्तर पर दस्तखत करियै समूलचे जम्मू-कश्मीर गी भारत दा अननुदृष्ट हिस्सा बनाई दित्ता हा। महाराजा हरी सिंह हुं'दा एह ऐतिहासिक फैसला बडे महत्वपूर्ण मौका पर आया हा कीजे उस बेल्ले पाकिस्तानी घसपैठिएं जम्मू-कश्मीर पर हमला करी दित्ते दा हा ते पाकिस्तान जबरन इसी अपने कन्नै रलाना चांहदा हा। पर विलय पत्तर पर दस्खत दे मगरा भारती फौजां इत्थे पुज्जियां ते उ'नें पाकिस्तानी घुसपैठिएं गी इत्थुआं खदेड़ी दित्ता। अज्जै दे इस ऐतिहासिक ध्याडे गी समूलचे जम्मू-कश्मीर च बडे गर्व कन्नै मनाया गेआ। अज्जै दे ध्याडे केई समारोह बी आयोजित कीते गे।

<><><><><><>

## Walk Dyslexi

शिक्षा सचिव संजय कुमार होरें विकलांग लोकें दे सशक्तिकरण सरबन्धी विभाग दे सचिव राजेश अग्रवाल हुंदे कन्नै रलिए अज्ज नमीं दिल्ली च विजय चौक थमां इंडिया गेट तोड़ी वाक डिसलेक्सी गी झंडी दस्सिए रवाना कीता। राष्ट्री डिस्लेक्सिया जागरूकता माह दे हेठ एह कार्यक्रम आयोजित कीता गेआ जेदा मकसद डिस्लेक्सिया गी समझने आस्तै ते तौले गै एहदा पता लाने आस्तै लोकें गी जागरूक करना ऐ। डिस्लेक्सिया इक सिक्खने सरबन्धी विकार ऐ। मीडिया गी संबोधित करदे होई संजय कुमार होरें डिस्लेक्सिया गी लेइए जागरूक रौहने ते समें रौहंदे एहदा पता लगने दी महत्वता पर लो पाई जेदे कन्नै कारगर इलाज ते सहयोग कन्नै पीड़ितें दा जीन असान बनाया जाई सकदा ऐ।

<><><><><><>